

GRISCHUN: «Nomady» less revoluziunar igl campar

Mintgign proprietari d'en campadi

Matia Demarmels/FMR

L'idea è simpla: la plattafurma digitala «Nomady» fò la punt tranter campaders e proprietari d'en toc taragn. Ed igl start up tgi collabore-scha tranter oter cun Grischun Vacanze crescha ad en crescher. Uscheia è l'interpresa permanentamaintg alla tschertga da locataris supplementars. Ampurmess vign en bel rap cun far relativmaintg pac persiva. La FMR ò ruschano cugl fundatour, cun Grischun Vacanze e cun Roman Brenn da Stierva tgi ò gio benevento enqualtgi giast.

Campar è an moda. La gliout para da tschar-tger veaple la nateira e l'aventura. Statisticas exactas n'existan betg. Tgi las admissiuns da campers e bus èn sa multiplitgeidas pigl factour treis igls davos onns an Svizra, è dantant franc en ferm indicatour tgi sottastritgescha chella tendenza. Savens vign alloura simplamaintg sa farmo e mess sen ena tenda x ensanouas. Nomady gida da schliier chel problem. Sen tals campadis stattan giasts numnadamaintg sur notg manevol alla nateira sainza campar selvadiamaintg.

En banc, en grill ed ena tualetta

«L'idea da fundar Nomady vaia gia an Alaska», declera Oliver Huber. Cugl concept ins



Igl bus digls giasts tgi èn stos sur notg a Stierva segl plaz da Roman ed Erika Brenn.

Foto MAD Roman Brenn

viglia sviluppar anavant modas classicas cun rulottas e promover en turissem durabel. «Nous lagn pussibilitar experientschas schi manevlas scu pussebel alla nateira e porscher aventuras tgi son betg neir cattadas sen piazzas da campar classicas.», rachinta igl om da Nossadunang anavant. Mintga proprietari u fittadign da taragn ni d'ena hetta so sa participar alla reit e dar a tschains en post per campar. Cant tg'ins viglia investir persi-

«A nous vogl per angrondaneir la turta, betg per midar la repartiziun da giasts.»

Patrick Dreher



Igl camp «Heidboden» a Tavo è agl our digl gôt.

Foto MAD Grischun Vacanze

va seia surlaschea ad egn e mintgign. Cler seia tgi l'attractivad digl li crescha cun far en pèr investziuns d'antschatta. «L'experientscha mossa tgi ena pussebladad per grillar e tschantar ed ena tualetta tanschan per avoir success. Igls fittadigns èn savens fitg anschignevels ed erigian sez chell'infrastruttura – uscheia ègl pussebel da metter an peis ena flotta plazza cun costs da bung 1000 francs.» Igl prietsch so neir fixo libramaintg digls fittadigns. La gliout seia pronta da paer 50 – 60 francs per star ena notg. 15% da chel import vigna dabung a Nomady. «Normalmaintg stattan igls giast egna u dus notgs. Campadis tgi on success gudognan rondond 10 000 francs ad onn cugl tschains dad en plaz.» Fitg dumandos seian er products locals. Persungas tgi vendan tals vegian alloura anc en gudogn supplementar.



Igl camp «Mittligada» a Tenna.



Igl fundatour Oliver Huber ò gia l'idea durant tg'el è sto an Alaska. Foto MAD Oliver Huber

Sustign da Grischun Vacanzas

Grischun Vacanzas è antro an cooperaziun cun la giovn'interpresa. Patrick Dreher, igl directour dalla partiziun innovaziun e svilup dalla purscheida d'evenimaints, declera pertge: «Chella collaboraziun faschaisa agl rom digl project «Alpine Circle» tgi ò la fe-nameira da promover viadis circulars aint igl cantun cun collier quatter attracziuns. Nomady porscha la pussebladad da campar manivel alla nateira sainza campar selvadiamaintg. Chella purscheida supplementara per la grupp da campers carschenta, lainsa purtar activamaintg aint igl Grischun.» Sustign finanziel na dattigl pero betg: «Nous ischan ni participos, ni purschignsa en sustign direct a moda finanziaria. Nous gidagn sclareir las situaziuns giuridicas e catter fittadigns supplementars. La lescha actuala lascha tscherts spazis d'interpretaziun pertugont campadis sen taragn privat.» Las situa-

ziuns giuridicas seian differentas da cumegn a cumegn. «Las nossas experientschas mosan tgi cumegn cun gronds campadis existents èn tendenzialmaintg pi restrictivs.» Chel ager fò betg surstar cun esser Nomady ena concorrenza potenziala per campadis tradiziunals. Patrick Dreher: «La nossa fe-nameira è adegna da purtar duple giasts aint igl Grischun. Scu tgi chels sa repartan alloura, è tgossa digl giast. Viandantas e viandants cun bus e tendas vegian anfignen ossa betg gia igl Grischun sen lour bucket list. «A nous vogl per angrondaneir la turta, betg per midar la repartiziun da giasts. Campadis tradiziunals cattan interessant, tgi Grischun Vacanzas peglia permangs la tematica digl boom da campar.»

Bungas experientschas

Gio s'annunztgia è Roman Brenn. «Igl neir aint è sto pac cumplitgia», declera igl om da Stierva tgi ò ratschet igls amprens giasts igl aton passo. Pigl mument porscha el en banc, electricitad ed en grill. Bod u tard painsa el da metter a disposiziun er ena tualetta. «Nous survagnign en e-mail schi ensatgi reservescha igl noss plaz. Fatg giu chint vign sur la plattafurma.» Schi seia cò igl interess mossa el er igl sies bagn puril. Pinavant vegia'l indirizo en kiosk per vender products. «Da chegl vign fatg fitg bagn adiever.» Experientschas negativas na vegia'l betg anc fatg anfignen ossa.

*Ulteriouras infurmaziuns: www.nomady.ch

«Nous lagn pussibilitar experientschas schi manevlas scu pussebel alla nateira e porscher aventuras tgi son betg neir cattadas sen plazzas da campar classicas.»

Oliver Huber



La vista d'en camp tgi sa catta survart Mustér.

Foto MAD Grischun Vacanzas